

Camischolas

8.2.85GQ

## Gion Andriu Berther



(FB) Nus Tuatschins vein da vegl enneu numnau els ils «Gion Andrius da Camischolas». Beinduras sei da semarveglier, cun tgei endinadadat nos per davons setenevan vid ils prenumbs da famiglia. Duront tschun generaziuns savein nus constatar quei tier la famiglia da nies defunct Gion Andriu.

1773 ha siu ururat Gion Andriu maridau Maria Marg. Caschalk da Breil. Il medem onn vegn lur affon battegiaus en la parochiala a Sedrun sil num Gion Andriu (\*1773 †1863). Sia consorta ei stada Onna Maria Monn (\*1780 †1848). Da quella lètg nescha 1805 il basat Gion Andriu (\*1887), era quel marida cun ina Onna Maria Monn (\*1803 †1858). Il tat (\*1836 †1895) marida cun Maria Christina Deflorin (\*1828 †1913). 1868 nescha il bab Gion Andriu, sia consorta ei stada Maria Tresa Berther (\*1876 †1924).

Da quella lètg deriva Gion Andriu Berther. El ei naschiuss iis 22 d'october 1905 a Camischolas entadem il vitg. El mir da sia casa paterna sesanfla ina statua da Nossadunna. Tenor pader Baseli Berther duess quella esser stada en in sontget en sper la punt da Tgamaura. Quel ei vegnius destruius enzacu dalla lavina. Statthal-

ter Gion Andriu Berther ha tschentau la statua suenter el mir da sia casa.

Sut protecziun da quella statua e da ses buns geniturs ha nies defunct giu la ventira da passentar, ensemens cun aunc sis fargliuns, ina sulegliva affonza. Siu bab possedeva in stupent puresser ed als affons ha ei tuccau da luvar e segidar, sco als biars affons Tuatschins da giez temps.

La scola primara ha el visitau a Sedrun, mintgacass tier il vegl scolast Tona Schmid da Caviggia Surrein/Sumvitg (†1939), la scola secundara ni scola reala sco nus schevan pli baul, a Camischolas. Quei tier scolast Bundi in onn e 1920 tier Sep Mudest Nay. Sco nus seregurdein era el in buob activ e sco scolar haveva el nuota difficultads. El era d'in temperament serius e ruasseivel, gie fidau. Quella qualitat ha el mantenu sia veta ora. Seregurdar sai aunc ch'el fuva in bien cantadur, la qualitat ch'el ha onns ora mess a disposiziun pli tard al chor viril e chor baselgia da Sedrun.

Finida la scola en vischnaunca ha siu bab tarmess il Gion Andriu per in onn ella scola agricola a Willisau. Sias enconuschienschas acquistadas leu ha el saviu duvrar e duvrar en siu tener-casa e puresser ina veta ora. El capeva e saveva enzatgei e bugen deva el, aschilunsch sco ins dumandava, in bien cusesegli.

Igl onn 1924 ei stau per la famiglia dils Gion Andrius in onn da gronda tristezza. Entras in accident ei la mumma Tresa spartida tut anetgamein da quest mund. Tgei tragica sort per quella famiglia. Sia sora Castgina ha stuiu surprender igl uffeci da mumma per l'entira famiglia. Ad ella, che viva aunc oz, seigi engraziau per tutta carezia.

1925 ha Gion Andriu fatg la scola da recrut. Staus returnaus ha sia sanadad dau da far. Ditg ha gl'aug docter (dr. Stiafen Berther) emprau da curar il giuven, mo adumbatten. Suerter ina greva operaziun a Glion el spital ha el giu quasi dus treis onns da se restabilir. Quei ha lu mussau da tener tempranza cun sias forzas. Mo nuota-

meins ha Gion Andriu luvrau aspramein sin funs, en clavau e nuegl.

1938 sespresa el cun la giuvna Luisa-Deragisch da Gionda, nua ch'el ha anflau ina buna consorta ed ina buna mumma per ses affons. Tschun affons ein stai la ventira dils geniturs, treis buobas e dus buobs. Ad els eis el staus in bien e premurau bab. Tuts han empriu ina clamada e daventai brava glieud. Muort las relaziuns da lur clamada ein els sereratgs egl jester, mo visetan bugen puspei la patria Tuatschina. Mo il num Gion Andriu ei buca pli sedaus vinavon en quella famiglia. Denton bein en la famiglia da siu frar Ulrich p.m. Mo era quei Gion Andriu rauassa gia sin il grond èr sut la baselgia da sogn Vigeli.

En sia veta da famiglia ha ei denton era buca muncau enqual adversitat pervia da sia atgna e la sanadad da sia consorta. Gion Andriu ha purtau quellas quietamein en spért cristian. Gion Andriu ei staus sia veta in um da bien plaid e fatg, buc in vischin da grondas caneras. El saveva star da siu meini, era sche quel plascheva buca adina a mintgin, mo untgeva da permalar il proxim. El era in caracter sincer ed aviert. Bein fuss el era staus stgis da surprender in uffeci ni l'auter, mo el ha mai encuretg tals.

Ils 13 da schaner ei Gion Andriu vegnius cumpignaus d'in grond pievel sin santeri a Sedrun. Leu spetgan sias restonzas terrestras la levada perpetna.

Car Gion Andriu, co savess jeu scriver questas lingias da comiau senza seregurdar dils bials dis da pastur passentai ensemens si Scharinas. Legria emplenescia miu cor seregurdond en engrazievladad da lezs dis. Paucs essan nus aunc che selegravon leu ensemens. Aschia aunc il vegl caluster da Sedrun ed il scribent da quest necrolog.

Allas famiglias dil defunct admettein nus nies sincer cordoli. Al defunct Gion Andriu detti il Segner il rauaus perpeten e sia glisch sclareschi ad el ella eternitat.